

Mazarin  
2925

La Prosperité mal-hevrevse,  
ov, le parfait abrege de l'histoire  
dv Cardinal Mazarin




RARE BOOK  
COLLECTION



THE LIBRARY OF THE  
UNIVERSITY OF  
NORTH CAROLINA  
AT  
CHAPEL HILL

Mazarin  
2925

UNIVERSITY OF N.C. AT CHAPEL HILL



00023009012



L A

PROSPERITE

MAL-HEUREUSE

OV LE PARFAIT ABREGE

DE L'HISTOIRE

D V

CARDINAL

MAZARIN,

OV SE VOID TOVTES LES RVSES ET  
toutes les Fourberies dont il s'est seruy pour  
arriuer au feste de la progieuse fortune  
où il s'est veu.

AVEC VNE RELATION DE TOVTES  
*les causes de sa disgrâce.*

L.

A PARIS,

---

M. DC. LI.

LA  
PROSPERITE  
MALHEUREUSE  
OU LE PARAIT ABREGÉ  
DE L'HISTOIRE  
D V  
CARDINAL  
MAZARIN

OU SE VOIT TOUTES LES RUSES ET  
toutes les Fourberies dont il s'est servi pour  
arriver au fesse de la prodigieuse fortune  
où il s'est veu  
AVEC UNE RELATION DE TOUTES  
les causes de sa disgrâce.

A PARIS  
M. DC. LI.



*LA PROSPERITE' MAL-HEV-  
reuse, ou le parfait Abregé de l'Histoire du Car-  
dinal Mazarin, où se void toutes les ruses & tou-  
tes les fourberies dont il s'est seruy, pour arriuer au  
fiste de la prodigieuse fortune où il s'est veu; Avec  
une fidelle Relation de toutes les causes de sa dis-  
grace.*

Dieu aveugle les meschans, dans leurs per-  
nicieuses maximes. *Esa. 27. Psal. 35.*

**Q**UOY que les Rois puissent disposer  
Souverainement de leurs affections,  
& qu'ils soient en liberté d'avoir de  
l'amour & de la haine pour quibon leur sem-  
ble; si est ce pourtant qu'ils ne deuroient ja-  
mais avoir des passions qui ne fussent parfai-  
tement iustes & bien reglees. Car leur desor-  
dre cause vn nombre infiny de ruines publi-  
ques, rend les Princes tres odieux à tout l'U-  
niuers, & les Favoris les plus miserables obiets  
de toute la nature créée. Quand la fable est  
acheuee, on les fait choir de la fortune qui  
les eleuoit, & on les despoille de leurs gran-



deurs pour les faire reuenir en leur premiere  
 forme: C'est ce qui fait qu'il ne faut pas me-  
 surer la statuë avec la colonne qui la soutient,  
 ny iuger del'homme par sa dignité ny par sa  
 fortune. Ces sangsuës publiques se detruisent  
 aussi tost par des foibles instrumens, que par  
 des puissances redoutables: & quand le iuste  
 courroux de Dieu les veut punir, sa Diuine  
 Majesté ny employe pas tousiours les espou-  
 uentables efforts de ses carreaux, ny les hor-  
 ribles grondans de son tonnerre, ainsi que nous  
 pouuons voir en la personne de Iule Mazarin,  
 qui s'estant esleué au feste des plus prodigieu-  
 ses grandeurs, par des ruses & par des four-  
 beries qui n'en eurent iamais de pareilles,  
 tranchoit desia du Souuerain, & vouloit assu-  
 jettir les Princes du sang à receuoir les loix  
 de son insigne tyrannie: mais à la fin son per-  
 nicieux attentat, comme vn principe tres fu-  
 funeste à tous ses desseins, a donné l'estre à  
 sa cheute, & à sa miserable deffaite. Ce mon-  
 stre est fils de Pierre Mazarin, marchand &  
 natif de Sicile, lequel apres auoir negocié  
 quelque temps en son pays, soit qu'il se fut  
 ruiné ou par mal-heur, ou par sa mauuaise  
 conduite fut contraint de faire banqueroute  
 à ses creanciers, & pour la seureté du reste de  
 son bien il prit la fuite, & s'en alla refugier à

Rome



Rome avec toute sa famille. Il eust six enfans de sa premiere femme, appellée la Signora Hortensia Bufalini, sçauoir est deux fils & quatre filles. Le plus ieune des deux fils se fit Religieux de l'Ordre de Saint Dominique pour descharger sa maison à cause de la misere où elle estoit, & l'aîné qui est le Cardinal Mazarin, duquel nous allons escrire la vie, se mit plus auant dans le monde, que l'autre ne s'estoit mis dans le Cloistre, pour tascher d'y faire fortune, ou d'une façon ou d'autre. Le moine paruint à l'Archeuesché d'Aix, & au Cardinalat sous le tiltre de Sainte Cecile, & nostre Mazarin arriua par les voyes que nous dirons tantost au Cardinalat, & à la plus prodigieuse fortune qui se soit veüe de nostre siecle. Cette premiere femme Hortensia Bufalini mourut en l'année 1639. & il en espousa quelque temps apres une autre, qu'on nomme la Signora Portia Ursini.

Ce Iule Mazarin estant deuenu en âge competent, & desirant selon son ambition d'emesurée de faire quelque grande fortune à quelque prix que ce fut, s'accoste de certains pipeurs, avec lesquels il fit vne particuliere connoissance, pour apprendre à filouter à toute sorte de jeux, où il se rendit si expert qu'il estoit impossible de mieux faire. Apres



celà, afin de profiter de la science où il estoit deuenu si excellent maistre, il tasche de s'accoster des plus grands, & de chercher vn employ qu'il le peut mettre à couuert des accidens qui pourroient arriuer de sa subtile filouterie. Si bien qu'il se mit à seruir le fils du Connestable Colonne s'en allant en Espagne avec luy, où il le quitta six mois aprez qu'il ne pouuoit pas bien reussir en ses desseins & que l'humeur des Espagnols se trouuoit incompatible avec la sienne.

S'en estant retourné en Italie, il fut en la Valteline où il porta quelque temps les armes; apres celà il se mit à seruir en la maison de Messieurs les Colonneze dans la ville de Rome, & en suite en celle de Sachetty, où il espargna quelque chose, comme est ordinairement l'humeur des Italiens d'aimer grandement l'argent & de se passer à peu: desquelles sommes tant du ieu que de son espargne, qui n'estoient pas veritablement petites eû égard à sa condition, il en deuint grandement peccunieux, ce qui luy donna encor sujet de se produire avec plus de hardiesse. C'est pourquoy le Cheualier Georges l'appelle petit valet, & fils d'un Chapelier de Palerme.

L'affection que Messieurs de Sachetty luy porterent fut la cause de sa haute fortune; car



ils le mirent en si bonne estime aupres du Cardinal Antonio Barberin, qu'il sollicita le Pape Urbain VIII. lors seant en la Chaire de Saint Pierre, de l'enuoyer en qualité de negociant aupres de Charles Emanuel Duc de Sauoye, avec monsieur de Pancirole, ce que sa Sainteté luy octroya en faueur de la priere qui luy en auoit faite. De sorte qu'après auoir reüssi fort heureusement en cette legation, cela luy donna lieu de songer à des emplois d'une nature plus releuée. Ce qui l'obligea de venir en France, en l'année mil six cens vingt-huict, où il fut présenté au Roy par le Cardinal de Bagny lors Nonce du Pape, & où il fut parfaitement bien receu de sa Maiesté, qui s'ouurit grandement à luy, & qui luy communiqua plusieurs affaires de consequence, en tesmoignage de la grande estime qu'il faisoit de sa personne, à cause de la bonne opinion qu'on luy auoit donnée de cet illustre Politique, & mesme à cause des bons services qu'on luy auoit fait entendre qu'il pouuoit rendre à la Couronne.

En suite d'un accüeil si glorieux pour vne personne de sa sorte, il fut en Piedmont en l'année 1630. au nom & sous l'autorité du Pape, pour accorder les differans qui s'estoient meus entre l'empereur, le Roy d'Espagne, &



le Duc de mantouë, & pour cela il passa par le Montferrat, où par vne belle & secrette intelligence, il negocia vne prodigieuse trahison contre son Prince legitime, en faisant sortir les François de Cazal, par vne porte, & les faisant en suite rentrer par vne autre, apres auoir fait premierement sortir les Espagnols & les Allemans hors de Mantouë; laissant aussi les François en possession de Cazal, contre la foy qu'il auoit promise de les en faire sortir comme les autres, & par ce moyen là il mit l'honneur & la conscience du Pape Urbain en compromis, & trompa frauduleusement le Saint Pere, l'Empereur: & le Roy d'Espagne. D'où s'en sont ensuiuis les furieuses guerres, & les sanglantes Batailles de l'Etat de Milan, de Flandres, d'Allemagne & de France, quoy que plusieurs Historiens de ceux qui ont écrit la Paix de Cazal l'en ayent loüé mal à propos pour luy complaire.

Il estimoit cette action si glorieuse, qu'il en fut quelque temps apres rendre compte à sa Sainteté, comme de la plus équitable & de la plus genereuse de toutes les actions des hommes. Et comme il auoit dessein de paruenir aux plus grands honneurs qui soient en toute la congregation des Fideles (quoy qu'il n'ait iamais esté du nombre,) il se fit d'Eglise,



& à la recommandation du Roy de France, & à la sollicitation du Cardinal Barberin, on le fit Chanoine de S. Iean de Latran, & Referendaire, à ce que l'on dit des deux signatures. Et en cette qualité il fut respecté comme l'un des plus considérables subiets de la Cour de Rome.

Après cela, il fut enuoyé Vice Legat en auignon, & Nonce extraordinaire en France en l'année mil six cens trente-quatre. Et s'estant dignement acquité de ces belles charges selon la portée de sa suffisance, il fut à Rome, iusques à ce que le Roy Louis XIII. luy eut commandé de le venir trouuer en France, par vne lettre de cachet qu'il lui enuoya, à la suscitatio du Cardinal de Richelieu, qui le regardoit comme vne personne qui le pouuoit grandement seruir aux desseins qu'il auoit de se maintenir, & de gouverner l'Estat à sa mode: & pareillement aussi pour le recompenser de la belle action qu'il auoit faite dans Casal, & dont nos Annalistes le glorifient avec des épithetes si pompeux & si magnifiques.

Il ne fut pas plustost arriué, que le Roy pour plaire au Cardinal de Richelieu, l'employa en des grandes affaires. Mais pour le recompenser de la paix de Sauoye, du traité de Casal, de l'achapt de Pignerole & de l'eschange de Monaco, qu'il auoit negocié avec tant de pruden-



ce, & pour luy donner plus d'autorité dans le Conseil où il fut appellé, & dans les charges dont il se deuoit meller à l'aduenir, le Roy le voulut honnorer du Chapeau de Cardinal. A ce suiet sa Maiesté enuoya à Rome : mais sa Sainteté estant bien informée de l'exécrable procédé que Mazarin auoit fait dans Casal, ferme l'oreille à la demande qu'on luy faisoit en faueur d'un homme si funeste à toute la nature. Et pour faire voir au Roy que ce refus ne tendoit aucunement à des-obliger sa Maiesté, il le coniure de choisir celuy qui luy plairoit d'entre tous ses subiers pour luy donner ce qu'il desnioit à l'autre avec tant de iustice : Mais que pour luy le Mazarin, sa Sainteté prioit le Roy de l'en dispenser, veu qu'il estoit si pernecieux à tout l'Vniuers, & qu'il estoit la cause principale de toutes les plus sanglantes guerres de l'Europe. Il est vray que sa trahison aigrit si bien les affaires, que du depuis le Roy de France & le Roy d'Espagne, ne se sont iamais peu resoudre à faire la paix, quelque propositions qu'on ait sçeu faire de part & d'autre pour la cōclure.

Neantmoins le Cardinal de Richelieu, qui auoit enuie de se seruir de ce fourbe en beaucoup d'affaires, fit si bien pour cet espagnol reuolté, qu'il porta le Roy à prier encore pour vne seconde fois sa Sainteté avec tant d'instance, que le



Pape fut comme contraint de lui accorder ce qu'il n'auoit aucunement enuie de faire pour vn homme qu'il scauoit bien n'estre que trop dangereux à toute l'Europe. Et pour n'encourir pas la disgrâce du Roy d'Espagne, à qui il auoit refusé la mesme chose pour Contalto, il luy accorda pareillement aussi le Chapeau de Cardinal, & en exclud par ce moyen là le sieur Visconty à qui il auoit intention de le donner, en faueur de la Couronne de Pologne.

Ces honneurs, quoy que plus grands qu'il ne pouuoit iamais esperer, ne furent rien en comparaison de celles qui luy furent faites en suite. Quelque temps apres le Cardinal de Richelieu, comme la seule intelligence qui mouuoit tout les affaires de France & qui les auoit portées au plus haut point où elles pouuoient estre mises, mourut au grand regret de tous ceux qui auoient le don de lire dans les choses futures. Ce qui obligea le Roy, croyant que ce Mazarin fut vn second Armand, enuoyé du Ciel pour s'en seruir comme du premier, à luy donner la conduite de tous les affaires de son Royaume. S'imaginant aussi qu'il n'y auoit que luy seul au monde capable de les bien entendre & de les bien gouverner, selon l'impression que le Cardinal de Richelieu luy en auoit donné. A mesme instant le Roy le fait son Conseil-



ler d'estat, luy declare iufques à la moindre de  
 ses intentions, luy communique les secrets les  
 plus importants, lui fait donner les memoires  
 que son predecesseur auoit laiffés, & luy com-  
 mandé de se tenir tousiours pres de luy, pour  
 l'assister en la conduite de ses plus grandes af-  
 faires. Et pour luy monstren encore de surcroit  
 l'estime qu'il faisoit de sa personne, il le fait Pa-  
 rin de son fils, alors Dauphin, & apresent Roy  
 de France.

A quelque temps de là, ce grand Prince  
 Louys XIII. se trouuant au lit de la mort, pour  
 acheuer de l'éleuer au feste des plus grands  
 honneurs de sa Couronne, voulu par vne De-  
 claration tres-authétique, signée de sa propre  
 main, de celle de la Reine, de Monsieur le Duc  
 d'Orleans, & verifiée en Parlement, qu'il fut  
 receu Ministre d'Estat, & vn des chefs du Con-  
 seil, tant sa Maiesté estoit preoccupée de la bon-  
 ne opinion qu'elle en auoit conceuë.

Et pour dignement composer le corps de  
 ce Conseil (dit ce grand Monarque.) Nous a-  
 uons estimé que nous ne pouuions faire vn  
 meilleur choix pour estre Ministre d'estat, que  
 de nos tres chers & tres-aymez Cousins le  
 Prince de Condé & le Cardinal Mazarin &c.  
 & plus bas, voulons & ordonnons que nostre  
 tres-cher & tres amé frere le Duc d'Orleans



& en son absence nostre tres-cher & tres-aimé le Prince de Condé & le Cardinal Mazarin soient chefs dudit Conseil, selon l'ordre qu'ils sont icy nommez, sous l'autorité de ladite Reine Regente. Et en outre nous desirons que ladite Dame Reine Regente mere de nos enfans, suive auchoix qu'elle fera, pour remplir les dignitez Ecclesiastiques, l'exemple que nous luy en auons donné, & qu'elle confere avec l'aduis de nostredit Cousin le Cardinal Mazarin, auquel nous auons fait connoistre l'affection que nous auons, que Dieu soit honoré en vn choix de cette importance

Voilà certes vne Declaration bien authentique & bien forte pour le maintenir en la suprême grandeur où la fortune l'a esleué par dessus le reste de ceux qui pouuoient legitime-ment pretendre à des honneurs si sublimes que les siennes. Vne Declaration comme celle là, faite par le plus iuste de tous les Roys de l'Vniuers, & autorisée par le plus Auguste Parlement du monde, doit estre s'il me semble inuiolable, & d'une nature permanente. Qui se pouroit opposer à cela sans renuerfer les loix, sans choquer la volonté du Souuerain, & sans vouloir destruire ce qu'il y a de plus saint & de plus venerable dans la société des hommes?

Oltre cela, ne fut-il pas déclaré l'un des executeurs du testament de ce grand Prince? Ou-



tre cela, ne fut-il pas naturalisé François? outre cela le Roy Louys XIV. seant en son Lit de Justice, ne fit-il pas casser en sa faueur l'Arrest donné le dix huitiesme iour de May contre les estrangers? & outre tout celà, quels miraculeux progresz ne se sont-ils pas faits dans le commencement de son Ministere, pour nous obliger à le tenir pour l'Ange Tutelaire de cét Estat, & pour l'vnique restaurateur de toute cette Monarchie Françoisse, quoy que bien souuent il n'en fut qu'une cause bien esloignée? Nos armes portent la terreur aux quatre coins de l'Vniuers, & nos Generaux d'Armée font des coups qui ne sçauroient passer que pour des miracles. Tout tremble au seul nom de ces Achilles François, & il n'est point de Potentat qui ne nous demande la Paix, ou qui ne recherche nostre alliance. Dix mille François taillent en pieces trante mille hommes de nos ennemis, & les places ou Cesar & Alexandre auroient perdu le nom de Conquerans, s'ouuroient deuant nous, tant nous auions donné de l'espouuante à tous les peuples de la terre. Le gain de huit ou dix sanglantes Batailles; la prise de cinquante-cinq ou soixante places tres importantes, & la deffaite de plus de trois ou quatre cens mille combatans, en quelque deux ans de temps,



sont les fruits de nos prodigieuses actions, & de nos illustres victoires. Et tout cela se faisoit pendant le Ministère de Mazarin, pour en honorer sa conduite. Il sçait les intentions de l'Empereur, du Roy d'Espagne, du Duc de Sauoye, & du Roy de France, vn chacun fie à sa foy les secrets de l'Estat, outre que par les lumieres dont la nature l'a pourueu, il en penetre beaucoup d'autres, selon Baudir en son Histoire du Marechal de Toiras, parlant de l'accord negocié entre le Roy de France & le Duc de Sauoye. S'est il passé quelque chose depuis la Regence iusques au iour de sa disgrâce qu'il n'ait ménagée, ou qu'il n'ait tasché de demesler à sa fantaisie ? se faisoit il aucun conseil ny aucune conference où il ny fut receu pour vn Oracle ? En maniant nos affaires ne manioit-il pas toutes les affaires de l'Europe ? N'estoit-ce pas luy qui éliſoit & qui instruisoit les Ambassadeurs, & qui donnoit des Arrests definitifs pour l'execution des resolutions qu'il auoit prises ? Ne s'estoit il pas rendu maistre absolu de la guerre & de la paix, & des armées que l'on enuoyoit tous les ans aux quatre coins de la terre ? en pillant tous les tresors de l'Estat, n'estoit-il pas deuenu le plus riche & le plus opulent Seigneur de l'Europe ? & finalement, ne vouloit-il pas attenter

à la personne des Princes du Sang Royal, & à la vie des plus illustres Senateurs du premier Parlement de France? Mais Dieu qui se lasse aussi bien que la fortune, de voir qu'un homme ne fait qu'abuser des dons qu'il luy fait, le remet en son premier neant, en le faisant choir de la cime de ses grandeurs au centre de ses disgraces. Si vous ne conduisez pas les affaires du monde selon mes loix, dit Dieu parlant vniuersellement à tous les hommes, en parlant aux Israélites; Je vous feray trespucher deuant vos ennemis, & ie vous puniray iusques à la mort sans qu'aucun vous poursuiue.

Saul fut bien chassé de ses Estats pour auoir voulu tyranniser le peuple? Ozias fut bien demis de la Royauté, pour auoir voulu vsurper l'office Sacerdotal? & Aman aussi chery du Roy Assuerus que l'ule Mazarin le scauroit estre de nostre Auguste Princeſſe, fut bien cloué à la Croix qu'il auoit préparé à la mesme innocence? & ce tyran de toutes les finances de France, estant coupable de tous ces crimes & plusieurs autres qui ne sont pas moins enormes, scauroit il euitier d'estre puny selon la grandeur de ses demerités?

Mais que nous sert cela de rapporter icy des exemples de cette nature, puis que c'est vn homme qui ne croit pas en Dieu, & moins

encore



enormes, ſçauroit il eũter d'eſtre puny ſelon la grandeur de ſes demerites ?

Mais que nous ſert cela de rapporter icy des exemples de cette nature , puis que c'eſt vn homme qui ne croit pas en Dieu & moins encore en ſes Oracles. Ce torrent d'orgueil & d'inſolence ſe deborde encore plus fort, & ſon ambition le porte à des extremittez qui ne ſont preſque pas conceuables, pour ſe vanger de quelques diſcours que le Duc de Beaufort auoit faits contre luy , il fait entendre à la Reine que le Duc de Vandoſme & ce Prince ne tenoient par tout où ils alloient que des paroles inſolentes & ſeditieufes contre ſa Maieſté, & meſme qu'ils auoient deſſein d'attenter à ſa Perſonne: Que cela tiroit à conſequence, & qu'il ſ'en falloit ſaiſir pour en faire vn exemple. La Reyne dont les extraordinaires bontez luy faiſoient adiouſter plus de foy qu'il ne fa-  
loit pas, aux eſtranges ſuppoſitions de ce perfide, conſent à leur detention, & ce conſentement ne fut pas plutoſt donné, qu'il va ſonger aux moyens de les arreſter, & de les faire conduire au Bois de Vincene. Monsieur de Beaufort fut le premier pris, & par conſequent le premier qui ſentit les coups de ſa prodigieuſe perfidie : Et quoy qu'innocent, il ne laiſſa pas d'eſtre conduit au lieu que nous venons

de dire. Il ne suffit pas d'auoir le fils, il faut encore prendre le pere, qui s'estoit refugie pres de Paris en l'vne de ses maisons. On y enuoye la compagnie de Mouiquetaires commandée par monsieur de Trois-Villes, & vne compagnie du Regiment des Gardes: mais ce Prince en ayant eu aduis se retire en Bretagne. Et certes, si ce Tyran a eu l'effronterie de s'attaquer à de si grands Princes, il aura bien l'effronterie d'entreprendre sur beaucoup de personnes comme nous verron tantost par la suite de ce petit abregé de son Histoire. A vray dire son abominable Politique luy enseigne à ne pas mieux traiter les vns que les autres. Et tout cela ne se faisoit que pour voir si la Reyne pouruoiroit à la seureté de sa personne, & si on luy bailleroit des gardes. Ce qui luy reüssit fort heureusement: car à mesme temps la Reyneluy fit donner vn appartement en son Palais, afin qu'il fut gardé comme le Roy, & quelque temps apres on luy donna encore des gardes.

C'est par des actions de cette importance qu'il pretend venir à bout de tout ce qu'il se propose, en faisant seruir d'exemple ceux qui le choqueront, & en donnant par ce moyen là de la terreur à ceux qui auroient enuie de faire la mesme chose: & c'est ainsi qu'il veut mon-



strer que toute l'autorité Royale est en sa disposition, & qu'il ne fait pas bon s'attaquer à sa personne.

Il oste la Sur-Intendence à monsieur Bourel, parce qu'il n'auoit pas voulu adherer à ses tyrannies. Il oste monsieur de Chauigny du Ministère, & il l'oblige à se deffaire de sa charge de Secrétaire d'Etat & du gouvernement du Bois de Vincennes pour la mesme chose: il contraint monsieur le President Bailleul de se deffaire de sa Sur-Intendence, parce que sa probité estoit inuulnérable: il disgracie monsieur le Chancelier: Il fait emprisonner le Mareschal de Ranzau, le Cheualier de l'Escalé & plusieurs autres dont le recit seroit trop long à deduire, & si il ne veut pas souffrir qu'on s'en pleigne en aucune façon. C'est porter sa tyrannie bien auant d'vser ainsi de nos biens & de nos vies, & ne vouloir pas qu'on s'en pleigne. A ces fins il fait expedier certains pouuoirs de la part du Roy à plusieurs particuliers pour se mesler dans les compagnies, & pour descouurir ceux qui avec liberté disoient leurs sentimens contre le gouvernement de son Ministère, afin de les acculer à mesme temps & de les faire punir en suite: mais le Parlement de Paris prenant connoissance de cette inquisition en reprime l'usage, avec deffenses à qui

que ce fut de s'entremettre plus de telles affaires.

Cela n'empesche pourtant pas que les charges, les honneurs & les finances dont il dispose comme bon luy semble, ne luy fasse grandissime quantité de creatures. Cemonstre engourdit les mains des ames venales aux depens d'autrui, pour s'affranchir de leurs coups, & de leur clabauderie. La vaine lueur de ses presens les esbloüit, & les oblige à prendre le party de cette sangsuë publique. Il represente à la Reyne la necessité de ses affaires, il fait donner la Sur-Intendance à d'Emery, & il luy fait voir qu'il n'a pas moins de pouuoir sur luy que sur sa charge, afin de l'obliger à faire toutes choses à sa mode. C'est ainsi qu'il ne s'est pas espargné de faire valoir la disposition qu'il a eu des finances à son profit, puis qu'il luy est passé, quatre-vingts-quatre millions tous les ans par les mains depuis l'année mil six cens quarante trois, des deniers des tailles, des fermes, du Domaine, des parties casuelles, des decimes, & d'une infinité de partis qu'il a faits contre le peuple, sans comprendre deux cens foixante millions, qui ont esté conuertis en Louys d'or, plus à son profit, qu'au profit de la Couronne.

La Chambre des Comptes a fait voir clairement



au Parlement de Paris, que les comptans font monter en vne seule année, iusques au nombre de cinquante millions, qui est vne somme immense & prodigieuse, au lieu qu'en la plus haute dépenſe du feu Roy on ne les a veu monter qu'à cinq millions tout au plus, & si bien ſouuent il y auoit quelque choſe à dire : mais ſes voleries ſont produites d'une humeur inſatiable. Cantariny & pluſieurs autres Banquiers ſçauent bien la quantité des remiſes qu'ils ont faites, & le nombre des Bordereaux des Louys d'or qu'ils ont enuoyé en Italie, ſous pretexte que c'eſtoit pour y payer les armées, y entretenant la guerre à deſſein de fauoriſer l'enleuement de nos finances. Quelles prodigieuſes dépenſes n'a-t'il pas faites au dépens du pauvre peuple ? il ne faut que conſiderer les paragan-tes qu'il a donnez pour le Cardinalat de ſon frere, les ſomptueux batimens qu'il a faits à Rome & à Paris, ce qu'il a donné aux Venitiens pour la dignité de Noble, & les gros mariages qu'il a deſtinez à ſes Niepces. Enfin les Banques de Rome, de Veniſe, de Genes & d'Amſterdam, ne ſont riches que de ſes peculats & de ſes voleries. Et pour l'exercer avec plus de violence, il a enuoyé des gens de guerre pour l'eſtabliſſement des nouuelles leuées ſur les peuples, & fait créer des Fuſiliers par routes

les prouinces, pour violenter ceux qui feroient  
difficulté de bailler leur bource. Et pour n'e-  
stre pas troublé en ses tyrannies, il a tousiours  
empesché la conuocation des Estats Generaux  
comme vn affaire qui pouuoit mettre des bor-  
nes à son humeur insatiable.

Le bon-heur de ses attentats & de ses vole-  
ries luy auoient tellement enflé le courage,  
qu'il ne songeoit plus qu'à trauerser les felici-  
tez du Conclaue, & qu'à ternir toute la gloire  
du Cardinal Pamphilio. Et passant plus outre  
il tache par la force des armes, d'obliger le Pa-  
pe à se desister de la poursuite qu'il auoit com-  
mencée de faire contre les Barberins. Il vient  
de ruiner la France à force de subsides, & il  
veut ruiner l'Italie par ses desordres.

A sa suscitation le Prince Thomas arme d'un  
costé, & monsieur de la Meilleraye de l'autre.  
Le premier prend quelques Chasteaux qui  
n'estoient pas fort importants, & le dernier  
prend Piombino & Portolongone, qui sont  
des places tres considerables, & tout cela se  
fait à trois fins: La premiere est pour faire écla-  
ter la grandeur où il se voyoit monté, dans vn  
pays où il n'auoit iamais passé que pour vn mi-  
serable fourbe. La seconde estoit pour prote-  
ger ceux qui estoient cause de son auance-  
ment à nostre preiudice, contre le Pere de



l'Eglise. Et la troisieme estoit , pour auoir le moyen de faire passer sous ce pretexte là , tout l'or & l'argent qu'il voloit à la France, ainsi que nous venons de le faire voir par les raisons que nous venons de dire.

Monfieur le Prince qui lisoit bien auant dans les deportemens de ce miserable Ministre, & qui iugeoit parfaitement où visioient toutes ses pernicieuses intentions , luy parle vertement, & luy fait entendre qu'il n'estoit pas homme à souffrir qu'il abusast avec vn empire si absolu , de l'autorité qu'on luy auoit donnée. Que ses extortions ruinoient l'Estat, & que ses tyrannies y pourroient susciter quelque desordre. Ce Ministre cale le voile, voyant qu'il auoit affaire à vn Prince qui ne luy pardonneroit pas s'il faisoit semblant de luy tenir teste. Et pour trauailler insensiblement aux moyens de se vanger ou de s'en deffaire, il fait entendre à la Reine qu'il le falloit enuoyer en Flandres, ce que sa Majesté luy accorda facilement, ne sçachant pas où il vouloit tendre. Mais ce qui deuoit estre la cause de son malheur, fut la veritable cause de sa gloire : Car il ni fit pas moins de miracles que d'actions heroïques. La France fut contrainte de le considerer comme le plus insigne Conquerant de la terre, & iamais ses armes ne furent honno-

rées de tant de progrez , que depuis qu'il les eut à la main , & qu'elles faisoient vanité de recevoir ses ordres. Toute la Flandre tremble au seul bruit de ses exploits, & ce pays n'a point de forts inexpugnables aux attaques de ce grand Prince. enfin sa gloire estoit si grande que Mazarin ne la pouuant souffrir, fut contraint de le faire rapeler , & de lui donner d'autres peuples à combattre, pour voir si la Victoire le suiuroit aussi bien contre les Espagnols, que contre ceux où il s'estoit rendu si redoutable. Enfin on l'enuoye en Catalogne, on luy fait assieger Lerida sans l'assister ny d'hommes ny d'argent, contre la promesse qu'on luy en auoit faite. On passe bien plus outre: car par l'entremise d'un espion Italien nomme Iouan Fredidy, on tasche de le liurer aux ennemis, qui leur redisoit tout ce qui se passoit dans l'armée. Et comme le Prince vit qu'on laissoit depérir toutes les troupes, il demande permission à la Reine de s'en reuenir, ce qu'on lui octroya avec des difficultez bien estranges.

Ce n'est pas tout: car apres s'estre attaqué aux Princes du sang, qui sont des creatures sacrées, & au veritable Lieutenant de Dieu, qui est la personne que tous les Chrestiens sont obligez de reuerer par dessus le reste des hommes, il se prend au plus Auguste Parlement du monde.



Le Mercredy vingt-huictiesme iour du mois d'Aoust de l'année mil six cents quarante-huict, il fait arrester Monsieur de Broussel & Monsieur le Nain Conseillers au Parlement de Paris, au sortir du *Te Deum*, qu'on venoit de chäter en l'Eglise Nostre-Dame, pour la quatriesme bataille que Monsieur le Prince auoit gagnées en Flandres, à cause qu'ils auoient représenté à leurs maiestez la misere du peuple, durant qu'il auoit voulu tyranniquement imposer quelques subsides sur eux, & sur tout le reste du peuple. C'est pourquoy tout le monde prit les armes, & faisant tendre les chaisnes par toute la ville, on fut contraint de les rendre. Le Regiment des gardes & les Suisses furent obligez de se retirer, & peu s'en falut qu'il n'y eut vn estrange massacre. Et si Messieurs du parlement n'eussent apporté l'ordre qu'ils apportèrent à pacifier l'emotion des peuples, il y eut eu grâde quantité de monde defait, sans aucune espece de misericorde. Et si apres tout cela la Reyne fut comme contrainte de les en remercier, de protester qu'elle tenoit à faueur toutes leurs procédures.

Qui est-ce qui auroit pû soupçonner apres cela quelque chose de funeste si la fuite ne nous l'eut appris à nostre preiudice? peu de temps apres on mene le Roy à Saint Germain

& Paris se void inuesty de toutes parts de gens de guerre. Mais parce que les Auteurs de ce desordre, s'estoient trompez en leur calcul, la Reyne se resolut de faire la paix & de ramener le Roy dans Paris, comme si elle en eut esté la plus satisfaite du monde. Pourtant cela ne dura qu'autant de temps qu'il leur en faloit, pour faire venir des troupes de tous costez, pour perdre cette puissante ville. A quoy bon de vouloir perdre tant de personnes, pour auoir fait le salut de ces deux Illustres protecteurs de la cause commune. Si le zele qu'ils ont pour le seruice du Roy & pour le bien de la patrie doit estre reconnu selon l'estendue de son merite. Ces dignes Senateurs deuroient estre honorez comme vn Scipion, ou comme vn Ciceron, apres qu'il eut deliuré Rome de de la coniuration de Catilina.

La haine que Iule Mazarin conceut apres cela contre le parlement & contre le peuple de Paris, à cause de cette procedure, le porta à des estranges extremitez, en sorte qu'il faillit à perdre le Roy, la Reyne, & tout l'Estat, & les voulant perdre & en voulant reduire la ville & ses habitans tous en cendre. Il fait croire à la Reyne qu'elle estoit obligée d'appuyer l'Autorité Royale, que le parlement de Paris flestrissoit tous les iours à son dire, & qu'elle



pouuoit sans bleſſer aucunement ſa conſcience, venger l'iniure qui auoit eſté faite à leurs Maieſtez, que c'eſtoit vn atentat qu'il falloit ſeuerement punir: que cela tiroit à conſequence: & que ſi l'on ſouffroit des rebellions de cette nature, qu'on leur en feroit bien ſouffrir d'autres: que les maximes d'eſtat n'eſtoient pas contraires à celles de Dieu, & qu'il en falloit faire neceſſairement vn exemple. La Reine qui ne voyoit pas iuſques où ce deſordre pouuoit porter les affaires, & par vne bonté trop preiudiciable à tous ſes eſtats, & à ſa perſonne, s'accorde librement aux volontez de ce funeſte ſanguinaire. Ce conſentement donné il fait venir les troupes que le Roy auoit dans tous les pays eſtrangers, pour bloquer Paris, abandonnant par ainſi toutes les places & les Prouinces que nous auions conquiſes, & meſmes toutes nos Frontieres à nos ennemis, qui y firent de grands deſordres. Et le cinquieſme iour de Ianuier de l'année 1649. veille des Rois, il fit ſortir le Roy, la Reine, & toute la Cour, à vne heure apres minuit, hors de Paris, & les fit aller à S. Germain en Laye, durant que tout le monde eſtoit aſſoupi de la bonne cher qu'il auoit fait, en beuuant à la ſanté du Roy, & criant le Roy boy à gorge deployée. Deux ou trois iours apres il fait inue-

stir Paris de toutes parts, & fait si bien boucher  
 tous les passages des viures, qu'il ny entroit  
 plus chose quelconque. Et par ce moyen là, il  
 croyoit d'esmouuoir les peuples contre le Par-  
 lement, & le Parlement contre les peuples :  
 mais il se trouua bien abusé en son calcul. Et  
 pour intimider ceux qui auroient enuie de les  
 proteger, & pour donner courage à ceux qui  
 desiroit leur perte, ses Partisans font coure des  
 billets & des Gazettes, pour faire voir que Pa-  
 ris est aux abois, que les peuples sont sans cœur,  
 & que la diuisió est si grande parmi eux, à cau-  
 se de la prise de Brie & de Charenton, & de l'ex-  
 treme necessité de la famine qui les accable,  
 qu'ils ne sçauent à quoy se resoudre, enfin ils  
 tachent de persuader à tout le monde, qu'ils  
 estoient prests d'aller à S. Germain, la corde  
 au col, pour demander pardon à leurs Maie-  
 stez, de la faute qu'ils auoient commise, qui  
 estoit des impostures bien grandes : Car au  
 contraire le Duc de Beaufort qui fut deliuré  
 bien tost, apres sa detention, comme par mi-  
 racle, se resouuenant du mauuais traitement  
 que Mazarin luy auoit fait, se declare ouuer-  
 tement pour Paris, passe au peril de sa vie des  
 Conuois de viures à trauers l'armee qui tenoit  
 la ville inuestie, & les assiste en tout ce qui lui  
 est possible.

Outre



Outre cela, l'union se trouue si grande entre le peuple & le Parlement, que Messieurs de Paris ne songent plus qu'à s'en aller teste baissée, droit à Saint Germain querir le Roy qu'ils aiment avec de grandes passions, pour le ramener à Paris, & pour punir les auteurs de ce desordre. La Reyne sembloit en ce rencontre risquer le tout pour le tout sous le pernicieux conseil de ce bonnet rouge. On arme de toutes parts; Messieurs de Paris se cotisent pour faire vne leuée de quelque cinquante mille hommes. Tous les autres Parlements de France se ioignent avec celuy de Paris, & l'Archiduc Leopold fait auancer toutes les troupes qu'il auoit en Flandres, pour leur donner main-forte, sans conter ce que quelques personnes de condition alloient faire en leur particulier, pour perdre cet ennemy commun de tous les peuples de Frâce. Et certes si l'on n'eut trauaillé à pacifier les affaires, la France s'en alloit estre perdue. Dieu pourtant nous redonna la paix contre toute sorte de d'apparences humaines. Le Roy, la Reyne, & toute la Cour, reuiennent à Paris, & l'on ne se souuient plus des choses passées. A peine commençoit-on à iouir des douceurs d'une tranquillité publique, que Mazarin ce tyran de tout le genre humain, voyant qu'il auoit à faire à Mon-

sieur le Prince, qui ne pouuoit pas souffrir ses insolences, & qui l'humilioit vn peu plus souvent qu'il ne le souhaittoit pas, en s'opposant à ses pernicioeux desseins, & en vsant quelquefois de menaces, se resoud de le faire assassiner de nuit, dans la place Dauphine, ne l'ayant pas pû perdre dans les perils de la guerre. Mais ce genereux Prince en ayant esté aduerty, & voulant sçauoir si l'aduis qu'on luy auoit donné estoit veritable, fit passer son carosse au lieu où on lui auoit dit qu'ô l'attendoit, n'y l'aisant qu vn laquais dedans, sur lequel on tira plusieurs coups de pistolet, dont il fut blessé, & les assassins n'i trouuant pas la persône du Prince, côme ils se l'estoient proposé, l'abbandonnent & se retirent en diligence. Mazarin craignant la fureur d'vn ennemi si redoutable, tâchant de couvrir cet attentat par vn autre, commande aux mesmes assassinateurs de tuer le President Chartô & Ioly Conseiller au Chastelet de Paris, qui estoient tous deux ensemble dans vn mesme carosse, afin de faire accuser Monsieur de Beaufort & Monsieur le Coadjuteur d'auoir fait faire le premier attentat, sur les coniectures qu'on pourroit tirer du second: en assure Monsieur le Prince, & se met en peine de chercher de faux tesmoins à force d'argent, afin de faire affirmer la supposition



qu'il auoit inuentée. Et par ainſi il croyoit les porter à ſe couper la gorge les vns les autres, pour n'auoir plus perſonnes à craindre.

Bref pour perdre à quelque pris que ce fut ce grand Prince qu'il auoit ſi fort offenſé, & duquel il craignoit eſtrangement la vangeance, il fait entendre à la Reine qu'il auoit deſſein de mettre l'autorité Royale ſi bas pour y arriuer, enſorte que leurs Maieſtez ne fuſſent pas en eſtat de l'en empescher quand il y en prendra enuie. Que nuls dons ny nules graces n'ont pas eſté capables de mettre des bornes à ſes ambitions dereglees, & qu'à tout propos il menace de ſe cantonner & de ſe mettre à la teſte de leurs ennemis.

Que ce n'eſt que pour celà qu'il ſ'empare des plus fortes places de France, & qui taſche d'attirer à ſon party, par dons ou par preſens, tous ceux qui le peuuent ſeruir en des entrepriſes ſi pernicieuſes. Qu'il faut neceſſairement le mettre en lieu de ſeureté, ou ſe reſoudre à voir toſt ou tard vſurper ſes Eſtats, & peut eſtre à finir ſes iours par vne voye auſſi déplorable que iraque.

À des perſuaſions ſi fortes & ſi bien deguiſées, la Reyne y conſent, & comme il eut gagné l'eſprit de cette Princeſſe, il taſche de gagner & de ſurprendre celui de Monsieur le

Duc d'Orléans, par des suppositions de mesme nature que celles que nous venons de dire. Mais pour se couvrir de l'atentat qu'il vouloit executer, il falloit faire sous-signer la detention des Princes à son Altesse Royale, afin que le Prince ne creût pas vn iour à venir que le Cardinal lui auoit procuré vne si funeste auanture. De sorte que le voilà parfaitement bien autorisé en les pernicieuses maximes. Il à l'Autorité du Roy par souffrance, il à l'esprit de Monsieur le Duc d'Orléans par surprise. Il ne faut plus que se porter à l'execution del'atentat, & prendre son temps pour ne pas faillir sa prise, car autrement il y va de sa perte, ce qu'il fit avec adresse. Le Mardi dix huietiemes iour du mois de Ianuier, sur les dix heures du soir, il leur fit dire qu'on deuoit tenir Cōseil au Palais Royal, pour affaire d'importance, Les Princes si trouuent: mais ils ny furent pas si tost entrés qu'ils furent arrestez prisonniers par ordre du Roy & conduits à mesme instant au Bois de Vincennes.

Ah perfidie estrange! est-ce l'a reconnoistre comme il faut les graces que ce grand Prince lui auoit faites de l'auoir maintenu dans son autorité, malgré tous les efforts que toute l'Europe faisoit pour le precipiter du gouvernement de l'État sur vn miserable suppli-

ce,



ce, pendant & apres le Blocus de Paris, comme à l'auteur de tous nos desordres ? Est-ce là estre bien reconnoissant en faueur d'une ame si genereuse que la sienne, que de vouloir rendre criminel de leze-Majesté quelque innocent qu'il fut en disant qu'il n'aspiroit qu'à la Souveraineté par le nombre infini des demandes qu'il faisoit à leurs Majestez des Gouvernemens & des places ? Estoit-ce vne necessité qu'il te falut monstrer ingrat pour te maintenir, ou reconnoissant pour te perdre. On void bien par là que l'ingratitude & l'ambition est le plus pernicieux de tous les vices dont l'homme puisse estre capable. Celled' Alexandre estoit si grande, que la conqueste de toute la terre habitable lui sembloit trop petite pour la satisfaire. Et celle du Cardinal Mazarin ne se pouvoit pas conter de trancher du Souverain, & de disposer des affaires de toute l'Europe. Il falloit attanter à la personne des Princes du sang, & à l'honneur de ceux qui l'auoient maintenu dans ses dignitez, contre toutes les conspirations que le Ciel & la terre auoient faites pour le perdre. Si Monsieur le Princee n'est soubçonne du crime de leze Majesté que pour auoir pretendu à des dignitez qui estoient grandement au dessous de luy, il n'est criminel que pour auoir demandé ce

qu'il croyoit qu'on ne luy pouuoit pas refuser avec iustice apres auoir mis les affaires del'Estat au plus haut poinct où elles pouuoient estre mises. Si monsieur le Prince n'est soupçonné de pretendre à la Couronne que parce qu'il a des places & des gouuernemens, la France a donc bien quantité de criminels comme luy puis qu'il se trouue quantité de personnes qui ont la mesme chose. Prends garde à toy si tu veux bien faire, le temps viendra que tu te repentiras d'y auoir procedé de la sorte.

Pendant l'emprisonnement de Messieurs les Princes, le peuple ne demande plus que la Paix generale, ce perfide la leur refuse à son preiudice: car s'il l'eut faite il se mettoit à couuert de toutes les disgraces qui luy sont arriuéees en suite. Au contraire il minute la perte de la ville de Bourdeaux pour mieux faire éclatter sa puissance: mais auparauant que d'aller là, il faut qu'il tasche de se mettre bien dans l'esprit du peuple. O l'estrange Politique! il veut perdre le peuple, & se veut mettre bien avec le peuple, ie ne puis pas comprendre comment est ce que celà se peut faire, à moins que de les sçauoir mettre dans vne diuision irreconciliable. Ce qui est bien difficile veu le temps où nous sommes, & apres leur auoir fait



deffiller les yeux à leurs affaires. En fin pour en  
 venir là il tâche de preoccuper l'esprit de leurs  
 majestez, & de leur faire concevoir des mau-  
 uaises impressions de la fidelité des Normans,  
 des Prouanceaux, & principalement des peu-  
 ples de Guyenne. Il leur fait accroire par de  
 tres horribles suppositions, qu'ils ont enuie  
 de faire comme les Anglois, & de se mettre en  
 Republique, qui est vne pensée qui ne peut  
 pas tomber que dans l'esprit du plus abo-  
 minable de tous les hommes. Mais avant de  
 se porter à la ruine des vns ou des autres, il  
 cherche l'occasion de se mettre bien avec les  
 habitans de Paris, & de les endormir par ses  
 inuentions, iusques à ce qu'il ait soumis tous  
 les precedens à sa tyrannique obeissance par  
 des cruantez inouïes, & pour cela il fait distri-  
 buer du blé à tout le menu peuple, aux dé-  
 pens de ses partisans, dit l'histoire, pour se met-  
 tre bien dans leur esprit, & pour les abuser par  
 cette fourberie. Mais tout cela n'a de rien ser-  
 uy aux fins qu'il s'estoit proposées. Il fut mes-  
 me contraint de se seruir de la Raliere pour se-  
 duire les mariniers & plusieurs autres habi-  
 tans, sur le dessein qu'il auoit de les faire sou-  
 leuer pour perdre le Parlement, & pour per-  
 dre les chefs de la Fronde Royale; Et pour les  
 mieux porter à suiure son party, il vse encore

d'une autre liberalité aux despens de sa Majesté, en faisant restablir la diminution qu'on auoit accordé de faire sur les entrées, afin d'indemniser les habitans du grand nombre des pertes qu'ils auoient faites pendant qu'il leur faisoit la guerre.

Et cependant qu'il leur fait ces grandes offres & qu'il leur rend ces insignes témoignages de son amitié, il ne laisse pas de chercher les occasions de les faire mourir de faim, en donnant grande quantité de passe-ports qu'il fait expedier de toutes parts, pour enleuer les grains hors de France, en faueur de Garand & de Cantarini, qui luy auoit donné la somme de huit cens mille liures pour ce bel affaire. Mais il a beau les amadoüer par ses fourberies, les parens, les alliez, les amis & les creatures de Messieurs les Princes ne laissent pas de luy brasser mille desordres. Les Frondeurs d'un autre costé ne laissent pas aussi de conspirer contre luy & de minuter sa perte. Misérable Politique pourras tu resister à tant d'ennemis que le Ciel te suscite ? Tes raisons d'Estat seront elles assez puissantes pour battre tous ces esprits en ruine, & pour perdre des partis qui sont capables de faire fousleuer toute l'Europe contre ton Eminence ? Bon Dieu qui te pourra appuyer contre des forces si redoutables ?



bles? mais plutost qui ne sera pas contre toy ,  
 cependant que tu t'en iras à Belle Garde & à  
 Bourdeaux , & que tu abandonneras les deux  
 meilleures Prouinces de France au pillage des  
 plus grands ennemis de cette Couronne?

Aussi tost dit , aussi tost fait , il fait partir leurs  
 Majestez pour s'en aller inuestir la ville de Bor-  
 deaux , & pour son interrest particulier , pour  
 perdre des subiets qui n'auoient iamaïs failly  
 qu'en s'opposant à les tyrannies. Voyez de gra-  
 ce iusques où va la rage de cét homme , qui  
 pour la propre querelle va exposer l'honneur  
 & la vie de leurs Maiestez ; deuant vne place  
 qui est plus fort dix fois en monde que l'armée  
 qu'il y conduit , & qui est mesme appuyée de  
 toutes les autres Prouinces de France. Et ce-  
 pendant qu'il ne fait que menacer & que brui-  
 re , l'armée d'e l'Archiduc Leopold & les trou-  
 pes du Marechal de Turenne viennent ius-  
 ques aux portes de Paris , en rauageant toute  
 la Champagne & la Picardie. Ce fut ce coup  
 là que les Parisiens commencerent à declamer  
 contre luy , & que les conspirateurs commen-  
 cerent à faire de merueilleux progres sur l'es-  
 prit des peuples. Tout le monde prend la li-  
 berté d'écrire contre son Eminence aussi bien  
 que durant les barricades de Paris , & il n'estoit  
 pas fils de bon pere ny de bonne mere , comme

dit le prouerbe , qui ne declamat hautement contre ce perturbateur de la felicité publique. Et si, quoy qu'il fut assaillant , il ne laissa pas d'estre contraint de faire vne paix peu aduantageuse pour luy, & ceder par force à Messieurs de Bordeaux , beaucoup plus qu'ils n'eussent pû esperer deuant le siege de leur ville: sans considerer les ignominies qu'il y reçeut : car on ne le voulut iamais regarder que comme vn simple valet, quelques offres qu'il leur ait pû faire. Et pour reparer la faute qu'il auoit faite en s'en reuenant , il leur enuoye vne lettre de Cachet de la part du Roy, pour rompre tous les traitez qu'on auoit faits avec les habitans de cette ville. Ne voila pas entendre parfaitement bien le mestier dont il se mesle avec si peu de prudence & si peu de conduite.

Delà il reuient à Paris où il n'y fut pas plustost arriue qu'il fit faire vn commandement de la part du Roy , à Monsieur de Beaufort & à Monsieur le Coadiuteur de sortir hors de Paris, voyant qu'il ne pouuoit pas executer les desseins qu'il auoit de les perdre dans vne ville où tout le peuple s'estoit declaré pour le salut de ses Dieux Tutelaires. Mais ces dignes Protecteurs de la cause commune, preuoyant bien les funestes intentions de leur ennemy



refusent d'y obïr, sçachant bien que ce n'estoit qu'un commandement inuanté par le plus abominable de tous les hommes, & qu'il n'y auoit point de seurté pour eux, en quelque lieu de France qu'ils peussent aller pour leur refuge. Ce qui fut veritablement cause de sa perte : Car comme ces Messieurs veirent que leur party n'estoit pas assez fort pour se deffaire de leur persecuteur, ils se liquerent avec le parti des Princes; & ainsi de deux diuers partis qu'ils estoient bandez les vns contre les autres pour s'empescher de faire leur salut, ils n'en firent qu'un qui porta coup, au grand regret du bonnet rouge, Monsieur le Coadiuteur tres habile en cela comme en beaucoup d'autres choses, voyant que Monsieur le Duc d'Orleans leur estoit fort necessaire, ne pert point temps de l'attirer à leur parti, afin de faire les affaires avec plus de poix & plus de force, veu que cestoit le seul qui pouuoit trauerser leurs desseins, & qu'ils deuoient craindre avec quelque espece de vraye semblance. Cela fait le Parlement qui n'attendoit que la parfaite vnion de ces puissances redoutables, se joint avec eux, & donne audience à tous ceux qui ne demandoient que sa perte. On l'accuse d'auoir volé toutes les Finances de France, & de les auoir faites

transporter hors du Royaume. On l'accuse d'auoir rendu miserables tous les peuples afin de les pouuoir mieux tyranniser à sa mode. On l'accuse d'auoir empesché la Paix & d'entretenir toûjours la guerre. On l'accuse d'auoir obligé de certains Capitaines des Gardes d'auoir quitte le seruice du Roy où ils estoient necessaires, pour aller escorter l'establissement des nouvelles leuées que ce tyrā faisoit sur les peuples. On l'accuse d'auoir fait establir des fuzelliers en diuerses Prouinces ou ils ont commis des inhumanitez & des barbaries à tout perdre. On l'accuse d'auoir enleué nuictamment le Roy, & d'auoir inuesti Paris, pour perdre le Parlement & le peuple. On l'accuse d'auoir voulu porter le Roy à la haine de ses subjects, & les subjects à la des-obeyssance de leur Prince. On l'accuse d'auoir voulu perdre Monseigneur le Duc d'Orleans, Messieurs les Princes, Monsieur de Beaufort, Monsieur le Coadjuteur, & plusieurs autres personnes. On l'accuse de vouloir contraindre le Roy à ne pas tenir sa parole à laquelle ce puisse estre qui est vne maxime trespernicieuse contre la foy, contre le droit des gens, & contre la seureté publique. On l'accuse d'auoir abusé de l'Autorité Royale pour perdre la Ville de Bourdeaux. On l'accuse d'auoir hazardé la personne du Roy, au voyage de Guye.



ne pour sa querelle particuliere. On l'accuse d'auoir fait perir nos armées en Allemagne, en Espagne, en Italie, & en Flandre, d'auoir abandonné nos alliez, & d'auoir exposé plusieurs Prouinces aux ennemis, afin d'entretenir plus long-temps la guerre, pour mieux pescher'en eau trouble & pour se redre plus considerable. On l'accuse d'auoir voulu attanter à la vie de tous ceux qui ont voulu représenter à sa Maiesté les necessitez de ses peuples. On l'accuse d'estre tout à fait ignorant aux affaires. On l'accuse d'estre estranger, & par consequent incapable du Ministère suiuant l'Arrest de l'année 1617. On l'accuse d'auoir vsurpé tyranniquement l'autorité Royale. On l'accuse d'estre d'une naissance indigne de sa charge. On l'accuse d'auoir des intelligences secrettes avec les ennemis de cette Couronne. Et finalement on l'accuse d'estre Magicien, & d'auoir grand commerce avec les esprits immondes. On produit vn Factum contre luy. Le Parlement se seruant de l'Arrest qui auoit esté donné contre le Mareschal d'Ancre, où la Cour declare tous estrangers incapables de tenir Offices, Benefices, Honneurs, Dignitez, Gouuernemens, & Capitaineries en ce Royaume: & se seruant encore de l'Arrest qu'il auoit donné contre lui le 8. iour de Ianvier,

pour auoit enleué le Roy à vne heure induë, & pour auoir bloqué Paris, & ainsi comme Criminel de leze Maiesté, & comme perturbateur du repos public, La Cour toutes les Chambres assemblées, Ordonna le 9. iour du mois de Feurier de l'année 1651. qu'il sortiroit de France, & si il ne le faisoit pas, il estoit enioint aux communes de courir sur luy: & fait deffences à tous Gouverneurs des places, Maires & Escheuins des villes, & autres subiets du Roy, de le retirer sur peine de la vie. Et nonobstant tout celà, il ne laisse pas de battre la campagne, de soustenir que toutes ses accusations sont fausses, de demander à estre iustifié, de crier hautement qu'il est naturalisé François, & de parler en faueur des estrangers. Il dit que cette qualité d'estranger n'a iamais esté rebutee ny par les gens de bien, ni par les bós Politiques. Qu'elle ne scauroit seruir que de pretexte aux factieux & aux ennemis de l'estat. Qu'il se trouue vn nombre infini d'estrangers qui ont eu plus d'autorité en France qu'il n'en a iamais eue: & qu'il est extremement necessaire d'auoir vn estranger pour bien gouverner le Royaume, affin qu'estant indifferant à toute sorte de personnes, il puisse administrer les affaires sans passion. Que si cette qualité d'estranger estoit si contraire aux loix du Royaume, & si preiu-



liciable au Gouuernement de l'estat, pour-  
 quoy est-ce que Messieurs du Parlement veri-  
 fierent la Declaration que Louis 13. auoit fai-  
 te si authentiquement en sa faueur, estant au  
 lit de la mort, & pourquoy est-ce qu'ils ne s'op-  
 poserent pas aux volontez de Louis 14. lors  
 qu'il fut au Parlement seant en son lit de Iusti-  
 ce. mais il a beau dire, il faut qu'il deloge, non  
 pas seulement parce qu'il est estranger: mais  
 parce que c'est vn Tyran, vn perturbateur du  
 repos public, vn homme qui a volé tous les  
 thresors de l'Estat, & vn pernicieux, qui a vou-  
 lu attenter à la personne des Princes.

FIN.







